

Un'kaan atätweb wà Petolà Nsema

Un'kaan atätweb a Petolà wà un'kaan a un'sen awà bàtòm akà klistò abà ban'buul mpem benàben kitiir a nsi a Azi Minjör, nàbà Türki. Baar a itiir a nsi aki bàkal baar a mpem a ube. Un'kaan awà akwen mupà làkyàn aba un'kanà: uman mpay mbwo mwey anà Klistò nton muswan mbaan akanankir aba. « Ukyer ubwan » sye taan lanswà, amà man'kyàn ande myilä anà ilä. Un'kaan awà wanjàkab itin inà. Itin kyätätweb kyà muswan an'kyàn a Nzam amà màkaloomà naa mbuur mbuur ukal win'kyeel, alà làfàpà mbwo a ngyöob a möö a dudu unsà idiim anàbwan kyà « nköön a möö ». Itiir kyà yweel kyamuswan mbaan a nkaäl, ayà amu Klistò, nton mukal mbuur anàbwan, un'so anàbwan itàkal un'kaar anàbääl wanjàbwan. Itiir kyätär kyà nton muyöb làkyàn a iköñ anàbà, yöb naa Nzam wà mbak a baar a möö anà bànàkwà. Itin kyànà kyà nton muwal ilää anàbwan nton baar anàmee nkwaan kyekà ba bafàkyer ndaa anàbwan. Ntsulà ifàpà baar anàyel un'kanà asànaa atö anà asyee mukal banàtsim ubwanàbwan. Yanswà ifàtsu unsà mbör a ntsüü. Nkye un'kaan awà wà ntööm a

Petolà? Amwey bafàkyer akyey. Bamwey bafàsi naa waa wun'kaan a un'lonki mwey ungo a mbul nkam yimfum a Petolà. Itàkal naa abà, ikaswanà naa waa bàtööm « baar bakàtön unsi asin » iköön ubwan ntön ba. Kyekà, ndaa ayi yàbulà ikal a kab a Nzam. Kyakin, abà ba bànàbilà afwee u meen, ba ban'kwo muswan nsöön aba anà mutà imbäl a Läsän, lāsän anàbwan là Nzam. Bi ibà baar ban'kwo muswöm nkääl a iköñ unsà mbaan anà ukwen a un'tön, möö abi wànàpà akà Klistö. Wà Klistö afàpà an'kyän a mpay ifàman bi, unsà nkääl anàbwan abi, unsà làkyän abi. Abun un'söön wamuswan Iköön umbwo a idiim a isin: bàkyer udu a Klistö « nkön a möö », aklistö bà nkön a möö a ndwà a dweelà mwey. Unsà ndaa iler un'sen a Isàlél u mön a Sinayi, ba bànàsà « un'lwaan anàscol, iköñ a mfum a angan, un'sen a Nzam, un'sen awà wànde ». Ba bambäl akà baar a ukwen a Nzam. Un'kaan awà bàtööm sye akà aklistö a Bitini. Kyeka, u nsemà a mbul nkam, kàkal anà mfum a Bitini iköb ande Pline le Zöne. « Babilön ». Nde akasii unsà an'kyän ande naa ba bàkal indjir abunàbun anà babäimà ndaa ambe yifa ifa akà atön aba mpa aba Ayuda, anà bamëy nkwaan. Kyakin ntööm wà mukyer mbwo yanswà mufakwey un'kanà ntön munaan an'kyän aba amu imbuur a Yesu Klistö awà mpay aba. U ngyamakà a an'diim iläab mbör, Petolà wàmufuur an'kyän ande mitääh naa Nzam ba möö katsü aben anà kape aben làkyän a möö

umbwo a ukwà anà ngwiiyà a Yesu Klisto. Asànaa Klisto, ba bàkal anà làbõõn u ndaa ande umbwo a nkaäl aba anà nsyää! aba kusa a mpay. An'lwen a nsyää! bapëe u ndaa iler isal a mbuur mbuur, nkaäl uboo a asyää! anà alwõõ, làbõõn uboo abaäl, möö uboo a Ikoõõ anà nkaäl kusa a baar mpa abà Ayuda. U kab làtyeen, un'soõn wàmupà ndam a nswëen akandweer, amfum a Ikoõõ, atõ anà anàlakwikilà banswà: ba bàkal anàtsim unsà mpay, bàsi làkyän unsà ilää a Nzam! Un'kaan an'tsu unsà mbor.

Isakal naa atääñ a un'kaan wà ban'sà mukuünà unsà làkwikilà aba, itàkal naa mpay yà mwo, yà sin sin ntõn imbal akyà ban'kwo ba mutà u meen: kyakin, ilwomà naa möö aba wanswà, nkaäl aba yanswà « iten isal anàbwan a Nzam », ntõn baar mpa abà Ayuda bàyob isal anàbwan aba anà bàsyänà Nzam kilà usàyà nde.

Mbor

¹ Më Petolà, ntööm a Yesu Klisto, an'pà mbor akà baar kàsõõl Nzam, bàfàkal u nsi a ingyey anà bàkyàpää u Põn, Ngalàtyà, Kapadõs, Azi anà Bitini,

² Taa Nzam kàlasõõl kusa asànaa kàkwen nde, u mbwo a un'kyeel a Dweelà, ntõn be làkal anà unkyeey akà Yesu Klisto anà bàjàpõnà u mbwo a an'kil ande.

Wey kab a ngway anà duu màkal mbõõn anà be!

Làkyän a möö

³ Wey nsaak ikal akà Nzam, Taa a Mwol abi Yesu Klisto! Unsà ngyeb ande yàkolàkol, nde kipe mōō akuin nton bi ikal anà lākyañ a mōō u mbwo a ngwiiyà a Yesu Klisto uboo a aku;

⁴ nton mudil kwal alà kàlōñ Nzam nton baar ande. Kwal ala lakwe anki latay, itakal labu ngingyay, itakal lapiy ntwen a la bwà. Nde wàmulōñà la u du nton be,

⁵ be baar ukatii nde kà unkaak a ngwal ande u mbwo a lākwikilà, nton ngweel a mōō ayà isàmenà kà ilà a ntsüü.

⁶ Kyakin, be labàñàyoł a un'sak, itakal naa u kitaan be labà u ngyeb u mbwo a nsii ifà ifà.

⁷ Nton ntal a lākwikilà abe lànàsii yan'sōñ ntal a wól alà lāfātay itakal naa la ban'fub u mbaa. Lakwikilà alà lasàwal nsyañà, lākoo anà ibyaäl umpal usàmenà Yesu Klisto.

⁸ Be lāfakwen Yesu Klisto ukōñ akun'man. Apana sye be labamusa lakwikilà amu nde itakal naa be nātuman anki, anà be labàmufuur a un'sak ifà asin anà wàlākoo,

⁹ nton be lan'wal isin a lākwikilà abe: ngweel a mōō abe.

¹⁰ Anangōom bālen anà bàbaal pānsi pānsi ngweel a mōō ayi, anà ba bāte ngōom nton kab a ngway alà kàlōñ Nzam nton be.

¹¹ Ba bālenà naa pañà nà, naa sye ndaa nà isàkal asànaa kākyaän Dweelà a Klisto kàkal uboo a ba, umpal kākyaän nde mpay isàkal akà Klisto kusà anà lākoo ande lāsàyà ungo.

¹² Nzam kàmëey akà anangoom naa isal aki kà kyàkal nton ba ñakwo anki, wëe ba kya bàkyerà nton be. Nton, apanà indiir ibi, alɔɔŋ a Làsan Anàbwan bálakyaänà bya u mbwo a ngwal a Dweelà In'kyeel kátóm Nzam fà du. Akyeey, ba ñakwo bàkwen musà ileer aba unsà bya.

Làkal unsà mɔɔ a in'kyeel

¹³ Kyakin, làyɔŋà an'kyän abe nton isal, làkal unsà làböön, lasi làkyän abe lanswà unsà kab a ngway alà bálátwääl kà ilä a mëey a Yesu Klisto.

¹⁴ Asànaa baan a unkyeey, twon lan'lab ilään a ndür làkal be akyà umpal làkal be anàdiimà,

¹⁵ wëe ifà imwey asànaa mbuur kàlabel wà in'kyeel, wey be làkal bà in'kyeel unsà nkääl abe yanswà,

¹⁶ nton, bàsön naa: « Be làsàkal bà ñin'kyeel, nton me in'wà anin'kyeel. »

¹⁷ Wëe isàkal naa be làfàbeel naa Taa, mbuur awà afàtsul nsan, ukɔɔn un'kol anàyɔŋ akà mbuur wanswà unsà isal ande, làkal unsà bɔɔmà sye umpal làbà be pà u mëen.

¹⁸ Làyɔb naa kà unsà indiir anàkwà anki, asànaa ngim, itàkal wɔl, waa bàlabeen unsà nkääl a ube làwël be akà aṭaaràbe.

¹⁹ Aay, be bàlabeen unsà an'kil a ntal a Klisto, asànaa mwan a un'kok akɔɔn too itàkal làbiin,

²⁰ awà bātóm kusa mutàkyer du anà mëen, anà bun'swen kà ilä a ntsüü nton be.

²¹ U mbwo a nde, be làfàsà làkwikilà amu Nzam awà kun'wiiy uboo a aku, anà kun'pè làkoo, ntòn làkwikilà anà làkyan abe màkal amu Nzam.

²² Be làpöñ mōō abe u mbwo a unkyeey akà ndandaa, ntòn be làkwen be a be ukōon akal ayà mpem yweel. Wey ukwen a mpem a pèelà anà bà ipepey bàkal uboo a be.

²³ Ntòn be bàlabör u mōō akün, kà u mbwo a imbeñ kyan'kwo mukwà anki, wèe u mbwo a imbeñ mpa kyan'kwo mukwà, unsà ndaa a Nzam ayà mōō anà yà mbul a in'tye.

²⁴ Ntòn:
mbuur wanswà wà asànaa un'leñ anàyom,
anà làkoo ande lanswà là asànaa iful a un'leñ,
un'leñ usàyom, iful ande kyan'bwà,

²⁵ wèe ndaa a Mwol yà mbul a in'tye.
Kyekà, ndaa ayi, yà Làsanj Anàbwanj alá bàlakyaän.

2

Ngyeel u mbwo a ngweel a Ndaa

¹ Abun, làpiy nkyel yanswà, an'kwaar a ube manswà, mpem yweel yanswà, un'kol wanswà, anà ntwee yanswà.

² Lànú'beel anàpōñà là Ndaa asànaa baan a kōō, ntòn u mbwo a la, be làyèl ntòn ngweel a mōō.

³ Kyakin, « be lan'kyey naa Mwol wà ubwanj. »

⁴ Làsin tsütsü apà nde, nkōñ a mōō ayà bàpiy baar, wèe ya yànjàsōol anà yàntal kusà a Nzam.

⁵ Be ñakwo làbilà asànaa nkɔŋ a mɔ̃ u ntöŋ a Ndwà ufàkal Dweelà, ntɔn mukyer itsun a angan a Nzam, ntɔn mukun'pà ibɔɔn in'kyeel abyà ufàkyey Nde u mbwo a Yesu Klistɔ.

⁶ Ntɔn basɔn u Ndaa Anàson naa:

« Le, me an'sà nkɔŋ a twerà u Siyɔn, nkɔŋ a ntal ayà kàsɔl me.

Mbuur awà asà làkyàn amu ya, usàman anki nswen akà ikikye. »

⁷ Abun, ibyàal kye akà be anàlàkwikilà, wɛɛ akà baar mpa abà anàlàkwikilà,

« nkɔŋ ayà bàpiy atöŋ, yàbulà nkɔŋ a isin, nkɔŋ a twerà.

⁸ Ya yà nkɔŋ mwey bàfàbɔl baar,

un'kul mwey afàbwi y baar. »

Baar abà bàfàbwà ba, ntɔn ba bàkyàton musà làkwikilà amu Ndaa. Awà undiir kàkwe mukayɛl.

⁹ Wɛɛ be, be làbà itwà anàscɔl, itsun a angan amfum, un'sen in'kyeel, un'sen kàwɛl Nzam ntɔn mukal wànde. Nde kàlabel mutoo u làpib anà muman pɛelà ande là ubem, ntɔn be làkakyään isal ande byà iban.

¹⁰ Itaan, be làkàl anki un'sen, wɛɛ apanà, be làbà un'sen a Nzam. Be baar mpa làwɛl nsyääm, wɛɛ apanà, be làkyàwal nsyääm a Nzam.

Làkàl asànaa asyääl a Nzam

¹¹ Ankwen ame, me amàlaleel, asànaa alyaan a mbwo anà angwey, twon lan'kal anà ilaän a ndür abyà ifànwaan ità anà mōō abe.

¹² Lākāl anà nkaāl aṇābwan kusà a baar mpa abà Ayudà, nton, unsà undiir nsil awà bāfàlatwee ba naa be lābā baar abe, ba bāmen isal abe byāṇābwan anà ba bāsi Nzam lākoo kà ila'usayà nde.

¹³ Lākāl anà unkyeey akà imfum a mēen kyan-swà, nton Mwol, itàkal akà mfum awe anà ikōb a dudu,

¹⁴ itàkal akà an'kuvernōōr ufātōm nde mupà ntaanāambar akà baar abe anà musyāṇà baar bāfākyer ubwan.

¹⁵ Nton ba bā ukwen a Nzam naa be lākyer ubwan nton mudubā min a insil mpa bāyob akà undiir mwey.

¹⁶ Lākāl asànaa baar abyē anà insaay, ukōon asyāāl kya asànaa nkuimà nton mufwe nkyel abe, wēē lākyer asànaa asyāāl a Nzam.

¹⁷ Lāpe ibyāāl akà baar banswà, lakwen atōṇ abe, lāyob ikōb a Nzam, lun'syāṇà mfum.

Mbaan a mpay a Klistō

¹⁸ Asyāāl a ndwà, lākāl anà unkyeey mbōon akà ankum abe, kàna akà bāṇābwan anà bāduu mpel anki, wēē anà akanitswumbuun.

¹⁹ Abun, yā ubwan mbōon mukyey mpay bāfipā ukōon isin aya, nton musyāṇà Nzam.

²⁰ Abun, lākoo nā mukan mpem naa bāladub nton ibii lan'kyer be? Wēē isàkal naa be lan'man

mpay ntòn ubwan lan'kyer be, la là kab a ngway u mii a Nzam.

²¹ Kyekà, yà ntòn ya waa bàlabel, ntòn Klistò sye kàkɔm mwääná ntòn be, nde kàlasweɲ mbaan ntòn be làlāb nkaäl ande.

²² Nde kàkyer anki man'be, ndaa a an'kwaar sye yàtoo anki u mun ande,

²³ nde kàfuur anki in'tswe, mpal bun'tò in'tswe. Wée mpal bun'pe ba mpay, nde kànjän anki, wée ya yanswà nde kàpe akà mbuur afàtsul nsan a balàbal lanšwà.

²⁴ Nde kasyen buur a man'be abi nde ɲakwo tii u kulunsi, ntòn bi kàkú anà man'be abi ɲakwo, ntòn bi ikàl anà mɔɔ ntòn balàbal, nde kàlakɔɔr u mbwo a iwà ande.

²⁵ Ntòn be làdiimà mbwo asànaa in'kɔk, wée apanà, be lan'furà akaun'kyeeɲ a in'kɔk anà un'leer a mɔɔ abe.

3

Akaar anà adim aba

¹ Be akaar sye, làkàl anà unkyeey akà adim abe, ntòn isàkal naa bye anà abaal bumwey uboo aba làkwikilà latey unsà ndaa a Nzam, waa ba bàsà làkwikilà u mɔɔ aba ntòn nkaäl anàbwan yà akyay aba,

² unsà nkaäl anàpɔɲà anà yà làzir abe.

³ Wey ntwen abe ikɔɔn akal nà u nsà mpel asànaa: ntswee anàtɔɲ, an'yak a wɔl anà ipfey a ntal,

⁴ wɛɛ, wɛy ntwen abɛ ikaɭ yaŋàyeɛ uboo a mpem, ntwen ikɔɔn mbɔɔn ya dweelà a làbɔɔn anà làduu, ya ntal a kolàkol u mii a Nzam.

⁵ Kyakin mbalà yumwɛy, yayi yàkaɭ mbwäär a akaar in'kyeɛl abà bàsi làkyän amu Nzam, abà bàkaɭ anà unkyeey akà adim aba,

⁶ asànaa Saal kasi nde làbɔɔn akà Abàlam anà kun'bel nde naa mwol ande, nde mbuur laba bɛ baan ande bakaar, mukyer ndaa anàbwan anà mukɔɔn akal unsà bɔɔmà.

⁷ Bɛ adim sye, làkaɭ anà nkaäl a un'tuüb unsà ngwem anà làyob nsöön a bwääl alye a akaar. Lasi akyay abe làzir, ntɔn ba, asànaa bɛ, ba bà anàkwàl a kab a ngway a mɔɔ, waa akà ndaa mwɛy ikɔɔn asà lingyoomà uboo a ngyamàkà abɛ.

Nkyeer a ubwan

⁸ Mumay, làkaɭ an'kyän an'mwɛy ma, làkaɭ anà ngweem a ngyeb, làkwen bɛ a bɛ, làkaɭ anà nsyaäm anà làbɔɔn.

⁹ Twon làfuur ube udu a ube, itàkaɭ in'tswe udu a in'tswe, wɛɛ làsaak, ntɔn bàlabel ntɔn nsaak, ntɔn muwal kwal a nsaak.

¹⁰ Kyakin,

« Wɛy mbuur akwen mɔɔ anà ilà anàbwan,
ukaɭ unsà igyɛɛn muten ndaa a mbe anà mutà
loor,

¹¹ uwɛy ube anà ukyer ubwan,
ulen duu anà ukaɭ uboo a la unsà mukuüna.

¹² Ntɔn mii a Mwol myà udu a baar a balàbal,

anà an'tsu' ande mà ipol ntòn muwem ngyamàkà
aba,
wë ntabwey a Mwol ifapà ngo'akà baar bafàkyer
ube. »

¹³ Nà asàlakyèr ube, isàkal naa bɛ làbà ngwal
mukyer ndaa anàbwan?

¹⁴ Itàkal naa bɛ làbà muman mpay ntòn
lafàkyèr bɛ ndaa a balàbal, làyòb naa bɛ làbà
unsà un'sak. Twon lan'man boomà a baar
bumwey anà twon lan'kal udu udu.

¹⁵ Wë làpɛ làkoo akà Klistò taan lanswà asànaa
Mwol uboo a mpem abɛ. Làkal ngwal taan
lanswà mufuur ndaa anàbwan akà baar banswà
bàkwen muyòb làkyàn alye anà bɛ.

¹⁶ Wë ya ikàl abà unsà duu anà làzir. Làkal
anà an'kyàn anàbwan ntòn baar bafàlatwë, anà
bafàman naa nkàäl a Klistò uboo abɛ yatɛy, waa
ba bàsàman nswen.

¹⁷ Isàkal naa ba bà ukwen a Nzam, yan'söön
ubwan muman mpay ntòn ubwan lafàkyèr bɛ,
akwànaa mukyer ube.

¹⁸ Kyakin, Klistò nde ñakwo, kàmɛn mpay
mbalà mwey ya, ntòn man'be a baar, nde mbuur
aköön man'be, waa kàlakweel, bɛ baar a man'be,
ntòn mukalapà akà Nzam. Nde bun'dwà unsà
ndür ande yà imbuur, wë bun'fuur u möö unsà
ngwal a Dweelà In'kyeel.

¹⁹ Kyakin kàkyen nde mukàlɔŋ itàkal naa
an'dweelà màkal uboo a bɔlokà,

²⁰ akà baar bàtòŋ mukyey, umpal kàkàŋ Nzam
mpem - kà ilä kàtòŋà Nòwà an'swà amà bàbilà

baar ntal ikikye, banswà bàkàl baar naan mpa bàkù'uboo a an'dà.

²¹ Kya kyàkàl idiim a nduüma akyà ifàlatswà mōō papanà: kya kà kyà ntòn mpōōj a labiin a ndür anki, wεε ntòn unkyeey akà Nzam unsà an'kyàn anàbwan, nde afàlatswà mōō u mbwo a ngwiiyà a Yesu Klisto,

²² awà kàkyen du, wà u kōō a ibaal a Nzam, anà bàpε sye akà nde muyaal udu a akyeey, anjikōb anà anangwal.

4

Mōō akün

¹ Abun, asànaa Klisto kàmen nde mpay u ndür ande, be sye làkàl anàtsim unsà an'kyàn nsil ma, ntòn mbuur awà kàmen mpay u ndür ande, kàkyakaab anà man'be,

² mpalàbà, wey nkääl abε, unsà ilä byan'saal unsi a mēen pà, ikàl asànaa abà ukwen a Nzam, wεε kà asànaa abà ukwen a baar anki.

³ Be sye làdwà taan mbōōn mukyer ndaa ayà ifàpà un'sak akà baar mpa abà Ayudà, mukal uboo a pfürà, unsà ilään a ndaa a mbe, unsà ngyōör a man, unsà in'kyōm, u nweel a man anà u ngyamàkà a itek.

⁴ Apanà, ba bà muman ndaa mwey yà ubem naa be lan'fàton mukyer ndaa a nswen kà imēey mbwo mwey anà ba, anà ba sye bàmukàlabey.

⁵ Wɛɛ ba bàsàmɛɛy nkyeer aba u mii a mbuur awà kan'kwo mutsul nsan a baar a mɔɔ anà bànàkwà.

⁶ Kyakin Làsan Anàbwan alà bàsam itàkal akà baar anàkwà: abun, itàkal naa ba bàsapà ntaanàmbar ntɔn nkàäl bàkal ba ayà u mɛen, asànaa naa baar banswà, wɛɛ unsà ngwal a Dweelà, ba ban'kwo mukal anà mɔɔ ufàpà Nzam.

⁷ Ntsüü a ndaa yanswà yà tsütsü. Kyakin, làkal anà an'yeerà anà imbämdir a Dweelà ntɔn bɛ làyamà.

⁸ Kusà aya yanswà, làkal anà ukwen a ngwalàngwal bɛ a bɛ, ntɔn ukwen bàfàdwa nkul.

⁹ Làkal anà mbaay bɛ a bɛ, ukɔɔn asà nkyeer.

¹⁰ Wey mbuur mbuur usi kab a ngway kàwɛl nde akà Nzam ntɔn ubwan a baar bumwey ukɔɔn anünün. Abun, bɛ làsàkal anà nkàäb anàbwan yan'kab a Nzam mà ifà ifà.

¹¹ Wey mbuur awe anà kab ntɔn mulɔn, nde u lɔn ndaa a Nzam. Wey mbuur awe anà kab ntɔn mubay baar bumwey, nde ukyer a ngwal ayà kun'pɛ Nzam. Wey naa unsà ya yanswà, làkoo làfurà akà Nzam, u mbwo a Yesu Klistɔ. Wey naa làkoo anà ngwal byàkal ipepey akà nde. Wöö wöö!

Mbiilà u mpay a Klistɔ

¹² Ankwen amɛ, twon lan'man ndaa yà ubem isàkal naa bɛ làbà muman mpay, asànaa naa ya yà ndaa mwey yà ingyey.

¹³ Wɛɛ bɛ làkàl unsà un'sak itàkal naa bɛ làbà muman mpay mbwo mwey ana Klistɔ, ntɔn bɛ làsàman un'sak mbɔɔn umpal làsàmenà làkoo ande akà baar banɔwà.

¹⁴ Isàkal naa bàsalato ntɔn bɛ làbà alɔŋki a Klistɔ, bɛ làbà baar un'sak, ntɔn Dweelà a làkoo, Dweelà a Nzam wuboo a bɛ.

¹⁵ Wɛy naa akà mbuur mwey amu bɛ ukɔɔn awal ntaanàambar, naa ntɔn nde kàkyer adwa, kàkyer ayib, kàkyer undiir mwey wà ube, anà kàbilà sye u ndaa abar.

¹⁶ Wɛɛ isàkal naa mbuur mwey an'man mpay naa ntɔn nde wà un'klistɔ, nde twon an'man nswen, wɛɛ wɛy nde upɛ Nzam làkoo ntɔn kan'wal nde ikɔb a un'klistɔ.

¹⁷ Taan a nsan lan'kwo, ya itàtwab akà bi baan a Nzam. Abun, isàkal naa ya isàtwab akà bi, wɛɛ ya isàkal aben akà baar bàfàtɔn Làsan Anàbwan a Nzam?

¹⁸ Asanaa itɛenà Ndaa Anàson:

« Isàkal naa mbuur a balàbal mɔɔ asàwà a mpay yanswà,

nkye isàkal akà mbuur un'be anà mbuur a man'be? »

¹⁹ Kyakin, wɛy baar bàfàman mpay asanaa abà ukwen a Nzam, bàpɛ mɔɔ aba akà Nkyer, nde mbuur a làbɔɔn, anà ba bàsi mukuüna mukyer ubwan.

5

Uler làböl a in'kək a Nzam

¹ Kyakin, me an'pà un'kanà akà andweer a Ikoön abà uboo a be. Me sye in'wà un'dweer asànaa ba, anà in'wà mbal a mpay a Klistò, me mbuur in'we anà kab a làkoo alà làsàmenà. Le undiir in'looma me akà ba;

² Ladii labòl a in'kòk kalape Nzam, twon làler la a un'kaak a ngwal wanswà, wée unsà mpem anàbwan asànaa ukwen Nzam, twon lan'kyer nton muleŋ bweel, wée unsà ukwen.

³ Twon làyaal baar abà balape muler a un'kaak a ngwal abe, wée làkal mbaan nton in'kòk.

⁴ Kyakin, be làsàwal mpà a làkoo mpa isàbi ubwan aya akà ikikye umpal usàyà Nkum a aseey.

⁵ Mbwo mwey, be atò anà asye, làkal anà unkyeey akà andweer. Anà be banswà, làkal anà làbòön unsà nkaäl abe, be a be, nton « Nzam afàton anun'yol, wée nde afàswan ubwan ande akà anàlàbòön. »

⁶ Abun, làsi làbòön ungyel a kòò a ngwal a Nzam, waa nde usàlaseen taan kàsi nde,

⁷ làpe nkyeer abe yanswà akà nde, nton nde mbuur afàlabon.

⁸ Làduub mii abe, làkal unsà igyeeŋ! nton nankir abe, ilen, wàmuyilen asanaa nkwee a umpor ayilen mbuur adyà.

⁹ Lumbaär, làkal anàtsim unsà làkwikilà abe. Làyob naa mpay nsil yayi bàpe akà aton abe abà u mēen.

¹⁰ Nzam, anangyeb yanswà awà kàlabel unsà làkoo ande là mbul a in'tye u mbwo a Klistò, nde

ɲakwo asàlapà ngwal ungo a kitaan làsàman be mpay, nde akyer asàlatiim, asàlatsumà udu a in'baän a ngwal.

¹¹ Wey iköb ikäl anà nde mbul a in'tye! Wöö' wöö!

Mbör a ntsüü

¹² Me kalasöön bingok bi u mbwo a Silàve, awà in'fàwal me asànaa un'ton a lää, nton mukàlaleel anà mutà imbal naa yà unsà kab a ngway a Nzam ländandaa waa be labanàtsim.

¹³ Ikön a aklistö akyà pà u Babilon, kyàmàlatööm mbör, anà Malakö, mwan ame.

¹⁴ Làpeel mbör a un'kaay a aton be a be.

Wey duu lakäl anà be banswà labà amu Klistö!

Bible Iyansi

The New Testament in the Yansi language of the Democratic Republic of the Congo: Bible Iyansi

copyright © 2024 Seed Company in coordination with Forum Communautaire des Traducteurs de la Bible et Alphabétisation

Language: (Yansi)

Contributor: The Seed Company

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-10

PDF generated using Haiola and XeLaTeX on 10 Sep 2025 from source files dated 10 Jul 2025

533ada40-f65c-5c48-9141-b107f37a0a9f